

人壽金鑑

人壽金鑑卷第十九

安東程得齡與九氏輯

七十一歲

宋史曰李昉既致政欲尋洛中九老故事時水部郎中朱昂與昉皆年七十一

案容齋隨筆亦載此

元史曰李謙字受益鄆之東阿人大德六年召爲翰林承旨以年七十一乞致仕九年又召至大元年給半俸仁宗爲皇太子徵爲太子少傅謙皆力辭仁宗即位召十六人謙居其首又曰亳州郭成年七十一母喪食粥廬墓一年朝夕哭臨人哀其老而能孝

明史曰邱濬字仲深瓊山人修憲宗實錄充副總裁宏治四年書成加太子太保尋命兼文淵閣大學士參預機務尚書入內

閣者自濬始時年七十一矣

又曰沈鯉字仲化歸德人萬曆二十九年趙志臯卒沈一貫獨當國廷推閣臣詔鯉以故官兼東閣大學士入參機務與朱賡並命屢辭不允明年七月始入朝時年七十有一矣

神仙傳曰西河少女使者問女及兒年各幾許答云妾年一百三十歲兒年七十一矣

聞見錄曰元豐五年文潞公以太尉畱守西都時富韓公以司徒致仕潞公慕唐白樂天九老會乃集洛中公卿大夫年德高者爲耆英會時宣徽使王拱辰畱守北京貽書潞公願與其會年七十一

案與事文類聚及齊東野語同

齊東野語曰吳中則元豐有十老之集承議郎崇大年七十一



白居易寫真詩序曰會昌二年罷太子少傅爲白衣居士又寫真於香山寺藏經堂時年七十一

東坡代張文定公作故龍圖閣學士滕公墓誌銘曰滕公元發除龍圖直學士復以爲鄆州徙真定河東治邊凜然威行西北號稱名將而宦官爲走馬者誣公病不任職詔徙許州御史論公守邊奇偉之狀且言其不病詔復畱河東而公已老蓋年七十有一矣

放翁題跋曰右家藏造化權輿六卷楚公舊藏有九伯父大觀中題字淳熙壬寅得之故第廢紙中用別本讐校而闕其不可知者兩本俱通者亦具疏其下六月四日山陰陸某謹記後十有四年慶元元年八月十二日重校凡三日而畢時年七十一又曰吾年十三四時侍先少傅居城南小隱偶見藤床上有淵

明詩因取讀之欣然會心日且暮家人呼食讀詩方樂至夜卒  
不就食今思之如數日前事也慶元元年九月二十九日山陰  
陸務觀書於三山龜堂時年七十有一

眉公集曰董其昌手書家誥時年七十一

白樂天詩曰吾今年已七十一眼昏髮白頭風眩

司馬文正公和景仁七十一偶成詩曰心地長閑爲已物年華  
不住是天時當如海上乘槎客維楫都無任所之

### 七十二歲

南史曰何子季曰何氏過江自晉司空充並葬吳西山子季家  
世年皆不永唯祖尚之至七十二子季年登祖壽乃移還吳作  
別山詩一首言甚悽愴

舊唐書曰趙昌拜安南都護夷人率化因屋壞傷脛乞還以裴

秦代之及泰爲首領所逐德宗詔昌問狀昌時年七十二而精健如少年者德宗奇之

元史曰賀仁傑字寬甫京兆鄭人大德九年年七十二請老拜光祿大夫平章政事商議陝西行中書省事賜白金楮幣錦袍玉帶歸第

明史曰海瑞字汝賢瓊山人改南京吏部右侍郎年已七十二矣疏言衰老願比古人尸諫之義

又曰朱賡字少欽浙江山陰人隆慶二年進士改庶吉士授編修萬曆三十四年沈一貫沈鯉去位賡獨當國年七十有二矣十六國春秋前涼錄曰張重華問于素綏曰老明父何名綏曰老明父名乾字元果孤單年七十二與鄰人益壽氏老女野合懷胎八十年乃生老子

荀子曰夫文王非無貴戚也非無子弟也非無便辟也倜然乃  
舉太公於州人而用之豈私之也哉以爲親邪則周姬姓也而  
彼姜姓也以爲故邪則未嘗相識也以爲好麗邪則夫人行年  
七十有二齟然而齒墜矣案猗覺寮雜記云世云太公八十遇  
文王東方朔客難云太公體仁行義  
七十有二設用於文武注云九十  
封齊則是遇文王時未八十也

夢溪筆談曰庫藏中物物數足而名差互者帳籍中謂之色繳  
音嘗有一從官知審官西院引見一武人於格合遷官其人自  
陳年六十無材力乞致仕敘致謙厚甚有可觀主判攘手曰某  
年七十二尚能拳毆數人此轅門也方六十歲豈得遽自引退  
京師人謂之色繳

天中記曰元退處士年七十二口中無齒每磨裝胡餅疾齧如  
刀年少不及常言而今方知齒爲妨物



游宦紀聞曰晉開運元年甲辰是年

元衍歲在甲辰四字

四月十五日楊

凝式有看花詩八韻時年七十二

事文類聚曰宋元豐洛陽耆英會中奉大夫充天章閣待制提  
舉崇福宮楚建中正叔年七十二詩曰自顧頽齡七十餘久慙  
頑鈍費洪鑪歸逢大耋年會衰朽形骸愧畫圖二相謨猷爛  
史編諸公才業過前賢好圖儀像傳來世何事頑疎亦比肩  
又曰宋元豐洛陽耆英會司農少卿致仕王謹言不疑年七十  
二詩曰相印貂冠粲六符華顛高會侍臣俱不將官職誇鄉里  
惟尚年齡入畫圖履道清歡追故事竚瞻陰德見訐謨叨陪几  
杖真榮觀珪璧叢中間硤砢

齊東野語曰吳興六老之會則慶厯六年集於南園大理寺丞  
吳安年七十二知幾之父時太守馬尋主之胡安定教授湖學



爲之序焉

又曰吳中則元豐有十老之集朝散大夫鄭方平年七十二  
清河書畫舫曰張仲壽題定武蘭亭云閱十年再觀前後凡五  
題也自己巳初觀至今一十九年矣余今行年七十二歲繼此  
又不知當幾觀乎

錫山景物略曰景泰末秦敬修旭築碧山吟社有十老堂楊聽  
玉理年七十二

陸龜蒙丁隱君歌序曰隱君姓丁氏字翰之濟陽人也名飛舉  
善養生能鼓琴居錢唐龍泓洞之左右余嘗南浮桐江途而詣  
龍泓憩館獲見綸巾布裘貌古而意淡問之年曰七十二當咸  
通丙午歲逮今十四年矣

放翁題跋曰予自乾道庚寅入蜀至淳熙戊戌東歸九年間兩

過巴東登秋風白雲二亭觀萊公手植檜未嘗不悵然流涕恨古人之不可作也又十有七年慶元丙辰六月二十四日山陰陸某書時年七十二

二老堂詩話曰郭功父正祥老人十拗予年七十二目視昏花耳中無時作風雨聲而實風雨却不甚聞因補一聯云夜雨稀聞聞耳雨春花微見見空花是亦兩拗也

中山詩話曰黃覺仕宦不遂嘗送客都門外不及寓邸舍會一道士取所攜酒炙呼飲之既而道士舉杯撫水寫呂字覺始悟其爲洞賓也又曰明年江南見君覺果得江南官及期見之出懷中大錢七其次十又小錢三曰數不可益也予藥數寸許告覺曰一以酒磨服之可保一歲無疾覺如其言至七十餘藥亦垂盡作詩曰牀頭歷日無多子屈指明年七十三

放翁七十二歲吟詩曰七十人言自古稀我今過二未全衰  
曾幾詩曰人生七十稀況復已過二

### 七十三歲

後漢書曰周磐字堅伯汝南安成人徵士燮之宗也建光元年  
年七十三歲朝會集諸生講論終日

北史曰賈秀位中庶子賜爵陽都男本州大宗正獻文即位進  
爵陽都子年七十三遇疾詔給醫藥賜几杖時朝廷舉動及大  
事不決每遣尚書高平公李敷就第訪決

宋史曰盧政太原文水人治平熙寧中爲捧日天武四廂都指  
揮使三衛都虞候副都指揮使涇原定州并代州定四路副都  
總管累轉祁州防禦黔州觀察使拜武泰軍節度使時年七十  
三氣貌不衰侍立殿下雖久無惰容能上馬踴躍觀者壯之



又曰巢谷初名穀字元修眉州眉山入元符二年谷竟往至梅州遺轍書曰我萬里步行見公不意自全今至梅矣不旬日必見死無恨矣轍驚喜曰此非今世人古之人也既見握手相泣已而道平生逾月不厭時年七十三瘦疾多病將復見軾於海南轍愍而止之曰君意則善然循至儋數千里當復渡海非老人事也谷曰我自視未即死也公無止我

金史曰烏延蒲盧渾曷懶路烏古敵昏人天眷二年授鎮國上將軍除安國軍以疾去官皇統六年授世襲謀克起爲延安尹賜尚衣一襲尋致仕海陵中起爲歸德尹大定二年至中都上謁除東京留守世宗召問年幾何對曰臣今年七十三矣上曰卿宿將久練兵事年雖老精神不衰因命到官每旬月一視事賜衣一襲進階開府儀同三司仍封豳國公

明史曰劉三吾茶陵人初名如孫以字行洪武十八年以茹瑺  
召至年七十三矣奏對稱旨授左贊善累遷翰林學士時天下  
初定典章闕略帝銳意制作宿儒凋謝得三吾晚悅之一切禮  
制及三場取士法多所刊定

又曰劉大夏字時雍華容人正德三年九月假田州岑猛事逮  
繫詔獄劉瑾欲坐以激變律死都御史屠滸持不可瑾謾罵曰  
即不死可無戍耶李東陽爲婉解且瑾誦大夏家實貧乃坐戍  
極邊初擬廣西焦芳曰是送若歸也遂改肅州大夏年已七十  
三布衣徒步過大明門下叩首而去觀者歎息泣下父老攜筐  
送食所至爲罷市焚香祝劉尚書生還

通鑑曰壬申賜禮部進士三百九十五人及第出身初諸郡鄉  
試卷多解呈御覽福州陳修作四海想中興賦有云慈嶺金堤

不日復廣輪之士泰山玉牒何時清封禪之塵帝吟誦此聯淒然出涕黏之壁至是修名在第三帝曰卿年幾何對曰臣年七十三問卿有幾子對曰臣尚未娶詔出宮人施氏嫁之

案鶴林玉露云

時人戲爲之語曰新人若問郎年幾五十年前二十三

文獻通考曰禮部侍郎杜德祥奏揀到新及第進士王希禹年七十三詔可祕書省正字

神仙傳曰時有一道士頗能治病從中國來欺人言我數百歲葛元知其誑會衆坐元謂所親曰欲知此公年否所親曰善忽有人從天上下舉座矚目良久集地看朱衣進賢冠入至此道士前曰天帝詔問公之定年幾許而欺誑百姓道士大怖下牀長跪答曰無狀實年七十三元因撫手大笑忽然失朱衣所在道士大慙遂不知所之



太平廣記曰郭秀之寓居海陵宋元嘉二十九年年七十三病止堂屋北有大棗樹高四丈許小婢晨起開戶掃起見棗樹上有一人修壯黑色著皂襪帽烏韋袴褶手操弧矢正立南面舉家出看見了秀之扶杖視之此人謂秀之曰僕來召君君宜速裝日出便不復見積五十三日如此秀之亡後便絕

清波雜志曰樸橄翁陶朱集載閩人韓南老就恩科有來議親者韓書一絕示之讀盡文書一百擔老來方得一青衫媒人卻問余年紀四十年前三十三樸橄單父人嘗宦於政宣間或云陳君向也

案俞文豹清夜錄載詹義登科後解嘲詩亦如此云云

游宦紀聞曰晉開運二年乙巳是年五月楊凝式於天宮寺題壁論維摩經等語八月再題太子少保時年七十三

齊東野語曰吳中則元豐有十老之集朝議大夫閭邱孝終蘇

州太守章岵朝請大夫徐九思朝散大夫徐思閔年俱七十三  
湘山野錄曰皇祐中明堂大享時世室亞獻無宮僚惟杜祁公  
衍以太子太師致仕南京仁宗詔公歸以侍祠公已老手染一  
疏以求免但直致數語更無表章鋪敘之飾止以奇牒妙墨臨  
帖行書親寫陳奏臣衍向者甫及年期還上印紱天慈極深曲  
徇私欲今犬馬之齒七十有三外雖支持中實衰弊且明堂大  
享千載難逢臣子豈不以捧璋侍祭爲榮遇臣但恐顛倒失容  
取戾非淺伏望陛下察臣非矯免預大禮無任屏營

書畫題跋記曰叔明公子文敏公之外甥也天姿神品其於翰  
墨深入晉漢至於鑒裁尤所精詣鷗波之宅相非子而誰耶至  
正壬辰冬公望一峰道人年七十有三

宛委餘編曰杭州耆老會在正統間孫適郭文敏皆七十三

錫山景物略曰景泰末秦敬修旭築碧山吟社有十老堂黃杏  
軒祿年七十三

天和觀重修碑文曰濟南厯下七十三歲處士許應魁題  
白樂天詩曰七十人難到過三更較稀

又曰七十三人難再到今春來是別花來

又曰七十三翁旦暮身誓關險路作通津

陸放翁七十三吟詩曰七十三年事事新涵濡幸作六朝民

### 七十四歲

左傳曰二月癸未晉悼夫人食輿人之城杞者絳縣人或年長  
矣無子而往與于食有與疑年使之年曰臣小人也不知紀年  
臣生之歲正月甲子朔四百有四十五甲子矣其季于今三之  
一也吏走問諸朝師曠曰魯叔仲惠伯曾卻成子于承匡之歲